



INTRODUCZIUN

DAD ANDRI CASANOVA-BAUMGARTNER

Quest evangeli presenta enteifer paucas lingias in schliet exempel ed in bien exempel. Ferms contrasts tegnan ensemen ils dus scenaris.

Ils mussaders dalla lescha, personas da num e pum e da grondas tschontschas, dattan in schliet maletg. Els fan il cuntrari da quei ch'els perdeggeschan. Els vegnan critisai fermamein da Jesus.

Tut auter eis ei cun ina paupra e semplia vieua. Senza plaid e spetachels dat ella in bien exempel. Ella dat tut quei ch'ella posseda; ella surdat plein fidonza sia atgna veta els mauns da Diu.

EVANGELI

Mc 12,38–44

³⁸En sia instrucziun ha el era detg: Sepertgirei dils mussaders dalla lescha che van bugen entuorn en rassas liungas e selain bugen salidar sillas plazzas publicas. ³⁹Els han bugen ils emprems posts ellas sinagogas ed ils plazs d'honor tier gastarias. ⁴⁰Els maglian vi la rauba dallas vieuas cul pretext da far liungas oraziuns. Els survegnan persuerter in ton pli rigurus castitg.

⁴¹Sesend visavi il tesor dil tempel, mirava el co la glied metteva muneida d'irom el tschep d'unfrenda. E biars rehs mettevan en rehamein. ⁴²Ina paupra vieua ei vegnida ed ha mess en duas pintgas muneidas, tut ensemen in cutrin. ⁴³Cheu ha Jesus clamau neutier ses giuvnals ed ha detg ad els: En ver Paid, jeu ditgel a vus: Quella paupra vieua ha dau dapli che tut ils auters che han mess enzatgei el tschep d'unfrenda. ⁴⁴Pertgei tut ils auters han unfriu da quei ch'ei vevan danvonz, ella denton, en sia paupradad, ha dau tut quei ch'ella possedeiva, tut quei ch'ella veva per viver.